

A C T I T U D E S

CABO D'AÑO - FABLA CHESA

Por VEREMUNDO MÉNDEZ COARASA

A la grata memoria de don Ricardo del Arco

*¡Cuánto te itamos de menos,
aquí'n la nuestra val chesa,
los güenos amigos tuyos,
dénde que dixés la tierra
y te nos ne fués pa siempre,
índoten sin date cuenta!
Amigos que has y que habiés,
que se cuentan por ucenas,
con alma, de chéns que viven
y sin d'ella, que son muertas;
y aunque n'bayan—que no n'ban—
no'n ye como l'alma nuestra;
peñas, abez, fáus y pinos,
cinglas, camóns y varellas,
foces, cantáls, canalizas,
calzóns, basquiñas, gorgueras,
guardan de tu güen recuerdo,
como tú lo dixés d'ellas.
De la Boca de l'Infierno,
de San Pedro de Ciresa,
de Camóns y Selva de Oza,
de Guarrinza y las Neteras.
De Alifonso, lo primero,
de los montes rials que beba,
estigiús, entre los chesos,
d'esta suya y recia tierra,
con lo lugar, los más viellos,
de l'Aragón que naceba,*

allá por lo siglo once.
 De lo nuestro flai Chuán Regla,
 que'n lo Concilio de Trento,
 iz que, mal papel, no feba.
 La Universidá que'n Xaca,
 planté Domingo «Rafela».
 De la fabla de los chesos,
 que agün ye la fabla nuestra
 y iqué mi-si-ó, de cuánto
 fablés, de las cosas chesas
 y escribiés, siempre con goyo,
 de la hombría d'esta tierra!
 Pues haber-bi lo consuelo,
 que lo írten tu, nos dié pena
 y que t'hemos mui presente
 que yes, tamién, cosa nuestra
 y que l'ausín de lo ivierno,
 cuando la campana chela,
 u lo cierzo se devanta
 y cuasi arrasa la selva,
 u l'agua, baxando a churros,
 con tronada, d'ixas feas,
 fa venir güena riada,
 que meyo mon se nos leva
 y lo nos planta'n Tortosa,
 que aplanau lo lugar dexan,
 no t'ha faltar la memoria,
 en meynos de tantas penas,
 de muitas chéns de la val,
 como tú la dixés d'ella
 y por si te fese falta,
 pa gozar la Gloria eterna,
 amónico, padres nuestros
 y aves marías te reza,
 qui estíe güen amigo tuyo
 y que te plora con pena,
 agora'n lo cabo d'año,
 dende que dixés la tierra
 y te nos ne fués pa siempre,
 indoten sin date cuenta...